

倘湖樵書

漢書



漢書門類		九	七	八	七
二	一	七	三	七	號
冊	架	函	冊	架	冊

內閣文庫		漢書	九	七	八	七
函	冊	架	冊	架	冊	架

十二上

內閣文庫		漢	9707
冊數	24	(	23)
函號	303	122	






倘湖樵書二編卷之十一目錄

蕭山毛奇齡大可氏論定

蕭山來集之元成父纂輯



取民之法流弊

尸諫 梅梁

農家測天

層樓之外另有虛市

天神現形

倘湖樵書二編

卷之十一目錄

一

倘湖小築

自然符印自然方藥

浮山浮墩浮田

化石

有志之士

拔崖至孝

泉石草本公而不私

物有本小而特大者

物有本大而或小者

雷能生物

知道者不言命相

古今勝蹟尤可追尋

茶與韭墨相反

因敗為功

昔賢有當時無名而後世反得其名者

三十六七十二之數

以設官為戲

遺骨之異


人之元神

取民之法流弊

取民之法多端雖流弊于後代而實濫觴于古昔金  
壘子云周禮凡民之貸者與其有司辨而授之以國  
服爲之息賸江何氏集註謂民有貸物于官者與有  
司辨其物定其價以授之還本之後服役于國中各  
有日數以爲息所謂以國服爲息也按王充云貧人  
負官重責貧無以償則身爲官作責畢竟是漢人之  
法猶有周官泉府遺意耳此法雖出于便民然而流  
弊遂有宋人青苗矣 洪容齋云隋書志晉自渡江

凡貨賣奴婢馬牛田宅有文券率錢一萬輸估四百  
人官賣者二百買者一百無文券者隨物所堪亦百  
分收四名爲散估歷宋齊梁陳如此以爲常以人競  
商販不爲田業故使均輸欲爲懲勸雖以此爲辭其  
寔利在侵削也今之牙契投稅正出于此田宅所係  
者大奉行惟謹至于奴婢牛馬雖著于令甲民不復  
問然官所取過多并郡邑導行之費蓋百分用其十  
五六又皆買者獨輸故爲數多者率隱減價值除立  
歲月坐是招激訐訴無已時矣此乃近日稅契之濫

觴至有奸民生事所立文券未幾而卽以匿稅投告  
官或謂其有利已而行紛紛多事不堪言矣 通考  
日市者商賈之事古之帝王其物貨取之任土所貢  
而有餘未有國家而市物者也而市之說則效于周  
官之泉府後世因之曰均輸日市易日和買皆以泉  
府藉口者也糴者民庶之事古之帝王其米粟取之  
十一所賦而有餘未有國家而糴粟者也而糴之說  
則倣于齊桓公魏文侯之平糴後世因之曰常平曰  
義倉日和糴皆以平糴藉口者也



尸諫

史魚尸諫古今流爲美談漢武故事上常輕服微行  
公孫弘數諫勿從弘謂其子曰吾年已八十餘陛下  
擢爲宰相士猶爲知己死况不世之主乎今陛下微  
行不已社稷必危吾雖不及史魚冀萬一以屍諫因  
自殺上聞而悲之自爲誄 嘉祐間殿中侍御史陳  
洙字思道同知諫院司馬光上疏乞選宗室爲皇嗣  
仁宗令以所言送中書而光欲出自上意洙曰若俟  
上自言當在何時遂上疏極陳東漢建儲不早之弊

杜喬李固徒取誅戮無益于事且曰陛下以臣懷異日之圖莫若殺臣之身用臣之言疏方上卽仰藥死以自明其無所冀奏下大計遂定司馬光疏陳其事仁宗賜洙錢十萬元祐初光復言乞除其一子官以旌忠義哲宗從之 永樂間董阜民字德之德與人明經任工部主事質直方毅不爲容悅時同官有被譖繫獄者阜民疾篤恐其罹刑置諫疏于懷死都門上憐其死諫命禮葬之遂赦被譖者夫明主不自開悟而致其臣以死諫其情寔可憫若其事遂行則忠

竟猶瞑目于九幽耳余故列記數事以見千古原不乏史魚也按裴晉公傳臨終自爲銘志帝怪索之得半稿以儲貳爲請則庶幾乎語不及私者矣若林逋所詠茂陵他日求遺稿尤喜曾無封禪書則又以不諫爲諫者焉

按韓詩外傳昔者衛大夫史魚病且死謂其子曰我數言蘧伯玉之賢而不能進彌子瑕不肖而不能退爲人臣生不能進賢退不肖死不當治喪正堂殯我于室足矣衛君問其故子以父言聞君造


然召遠伯玉而貴之而退彌子瑕從殯于正堂成禮而後去生以身諫死以尸諫可謂直矣詩曰靖共爾位好是正直

三國吳邵疇字溫伯山陰人爲郡功曹孫皓時太守郭誕以不白妖言被收遠無以自明疇進曰疇今在明府何憂遂詣吏上疇詞皓怒猶盛疇恐誕卒不免遂自殺以證之臨亡置辭曰疇生長邊陲不閑教道得以門資厠身本郡逾越儕類位極朝右不能贊揚盛化養之以福今妖訛橫興干國亂紀疇以尊

之語本非事實雖家誦人詠不足有嫌天下重器而匹夫橫議疾其醜聲不忍聞見欲含垢藏疾不彰之翰筆鎮躁歸靜使之自息愚心勤勤每執斯旨故誕屈其所是默以見從此之爲愆寔由于疇謹不敢逃死歸罪有司惟乞天鑒吏收疇喪得詞以聞誕遂獲免皓嘉疇節義詔郡國圖形廟堂後漢書靈帝光和元年初開西邸賣官自關內侯虎賁羽林入錢各有差私令左右賣公卿公千萬卿五百萬中平二年中常侍張讓趙忠說帝歛天下田每畝十錢以修宮



室又令西園騶分道督趣刺史二千石及茂才孝廉  
遷除皆責助軍修宮錢大郡至二三千萬餘各有差  
當之官皆迫遣之時北鉅鹿太守司馬直新除以有  
清名減責三百萬直被詔悵然曰爲民父母而反割  
剝百姓以稱時求吾不忍也辭疾不聽行至孟津上  
書極諫當世之失書奏卽吞藥自殺帝爲暫絕修宮  
錢 漢哀帝時丞相王嘉以薦梁祖又封還益董賢  
戶事帝怒召詣廷尉嘉不肯咀藥自詣廷尉吏詰問  
嘉嘉對爲國惜賢無所私吏稍侵辱嘉嘉喟然仰天  
嘆曰幸得充備宰相不能進賢退不肖以是負國死  
有餘責吏問賢不肖主名嘉曰賢故丞相孔光大司  
空何武不能進惡高安侯董賢父子佞邪亂朝而不  
能退罪當死死無所恨嘉繫獄二十餘日不食嘔血  
死此乃真有史魚之風云



梅梁

霏雪錄云禹廟梅梁乃太梅山所產梅樹也山在鄞  
 縣東南七十里蓋梅子真隱處石洞仙井丹竈藥爐  
 猶存山頂大梅樹其上則為會稽禹祠之梁其下則  
 為他山堰之梁禹祠之梁唐張僧繇畫龍其上夜大  
 風雨嘗飛入鏡湖與龍鬪人見梁上水淋漓濕萍藻  
 滿焉始駭異之乃以鐵索鎖于柱他山堰之梁長三  
 丈許去岸數尺歲久不朽大水不漂因刀墮誤傷之  
 出血不止今禹廟以他梅樹代之不斷不削存故事

耳非舊物也 會稽志云梁季修廟忽風雨大至湖中得一木取以爲梁乃梅梁也 金陵覽古云晉孝武太元三年僕射謝安作新宮太極殿欠一梁有梅木流至石頭城下取用之畫梅花于梁上表瑞因名梅梁殿蘓州記云淹梅溪昔有梅樹吳國采爲姑蘓臺後忽于此沉今湖州側猶有梅溪云名勝志太湖夫椒山東有梅梁湖吳時進梅梁至此舟沉失梁至春首則水面生花今之梅樹其可爲梁者甚少而况作太極殿之梁與姑蘓臺之梁乎若夫梅山之樹上

可作禹廟之梁而下作他山堰之梁猶長三丈許固是神物不待其鬪龍出血而始爲異也 按會稽志漢武帝時民以愆旱灾蝗祈王笥山輒應乃相率至觀旣構殿少中梁忽一夕風雷大作明日霽乃天降白玉梁一于殿上光彩瑩目因號玉梁觀至魏武遣使取之去觀九里午時雷霆裂殿梁化爲黃龍乘雲而去則會稽勝蹟又不特梅梁也 湧幢小品云梅澗湖在姚江之北有梅龍舊經云谿有古梅吳時作姑蘓臺伐以爲梁而存其根產木成塢有巨木臥湖

心水涸不露人由此神之曰梅龍蓋梅梁之根云秋  
七八月雷雨交作有聲如鼙吼聞數里土人相傳梅  
龍顧子十道志吳造建鄴宮始取材至明堂谿見古  
梅其材中梁取以還都梁已具無所用之一夕梅忽  
飛還土人異之號曰梅君今在湖中隨水浮沉一云  
會稽禹廟梁卽此木 述異記會稽山夏禹廟中有  
梅梁忽一春而生枝葉

### 農家測天

風雨霜露之事老農諳習已久其所測天時比于保  
章挈壺爲尤確切蓋由來傳習而徵驗之故也 後  
山談叢云春之風數爲夏之雨數小大緩急亦如之  
諺云行得春風有夏雨 鷄肋篇云江南人謂社日  
有霜必雨丙辰春社繁霜濃瓦次日果大雨 陸象  
山云泉之盛一甲子而止動早則及夏淺動晚則入  
夏深泉與雨澤亦相表裏故動早早徵動晚晚徵今  
先啓蟄而動則不及夏矣 黃河隨時漲落自立春

後解凍候人量水初至凡一寸則夏秋當至一尺頗  
爲信驗謂之信水非時暴漲謂之客水 研北雜誌  
云世謂正月三日爲田本命浙西人謂之夏正三言  
夏正之三日俗以是日秤水以重爲上則有年極驗  
楊子江中沙田田戶每歲日取水一瓶以秤水水  
重則是年江水大輕則水小歲歲不差 湧幢小品  
云春雪不宜過多多則百廿日必有大風雨俗謂之  
雪報最傷農 羣芳譜云霜降日見霜則清明日霜  
止或前或後日數皆同若霜降一日前見霜則知清

明一目前霜止霜降後一日見霜則知清明後一日  
霜止五日十日而往前後同占也田家出秧必待霜  
止甚驗 十月霧爲沫露主來年水大相去二百單  
五口水至須看霧着水面則輕離水面則重 朝野  
僉載春雷始鳴記其日數滿二百十日霜必降又曰  
雁從北來記其日後十八日霜降 三月雪不消則  
九月霜不降 望九日晴則冬至元日上元清明四  
日皆晴雨則皆雨 夏至有風三伏熱重陽無雨一  
冬晴此古諺也又有云夏至酉逢三伏熱重陽戊遇

一冬晴康熙丙辰九月九爲戊子是日又無雨故一冬皆晴 補筆談云世俗十月遇壬日北人謂之入易吳人謂之倒布壬日如本月癸日差溫類九月甲日類八月如此倒布之直至辛日如十一月遇春秋時節卽溫夏卽暑冬卽寒辛日以後自如時令此不出陰陽書然每歲候之亦時有准 研北雜誌云冬至後九日遇壬法當有年 鶴林玉露載范石湖詩云朝霞不出門暮霞行千里今晨日未出曉氛散如綺心疑雨再作轉眼雲四起我豈知天道吳儂諺云

爾古來占滂沱說者類恢詭飛雲走羣羊停雲浴二  
稀月當天畢宿風自少女起爛石燒成香汗礎潤如  
洗逐婦鳩能拙穴居狸有智蜥蜴啣冰雹蟬若春  
杵埵鳴東山鸛堂審南柯蟻或加陰石鞭或議陽門  
閉或云逢庚變或自換甲始刑鷺與象龍聚訟非一  
理不如老農諺影響捷如鬼哦詩敢誇博聊用醒午  
睡予乃增補二句云日占出海時月驗仰瓦體蓋諺  
有云日出早雨淋腦日出晏晒殺雁又有云月如懸  
弓少雨多風月如仰瓦不召自下 夏雲起自西南

者雨必多諺云西南陣過也落三寸 上風雲雖開  
 下風雲不散主雨 初下霜一朝即止者謂之孤霜  
 主來年旱連朝以上者豐上有鎗鏃者吉平者凶  
 有利無利但看四月十二言此日宜晴也有穀無穀  
 但看四月十六言此日宜雨也 伏裏西北風臘底  
 船不通 六月一日一天雨夜夜風潮到立秋 頭  
 亭生子沒殺二亭二葦生子旱殺三亭

蜃樓之外另有虛市

沙門島相聯屬有鼉磯牽牛大竹小竹四島紫翠巉  
 絕出沒於波濤之表真神仙所宅也蘓子瞻云海市  
 現滅時在數島上吳興慎蒙曰海市春夏見秋冬少  
 見大霧後天晴見天陰不見微風與無風不見大風  
 不見風微急其見也速而巧風微緩其見也遲而拙  
 蘓公見之于歲晚故長歌以志喜慎公見之于孟夏  
 故窮奇盡變作爲記而淋漓曲暢焉乃亦有不必于  
 海不必于蜃而平野之中能成墟市亦學者之所當

溪考也。太史公天官書固云海旁蜃氣象樓臺廣野氣成宮闕然雲氣各象其山川人民所聚積。歐陽公嘗言謫官彝陵時舟泊漢江野岸中夕後聞語言歌嘯老幼男女甚衆亦有交易評議及賣果餌之聲若市井然迨曉方止翼日步于江畔曠無人跡但遙見一蕪城基址詢舟人云古隋地也。汶上縣石樓泊在縣西南二十里周迴三十里每秋水泛漲一望無際遙觀村落在烟波杳靄中又常有城樓人馬之狀出于水上謂之水市洵奇觀也。闕亭在南旺

湖中高阜六七層自隱桓以下皆墓于此至今水際時見烟雲樓臺之狀。東阿縣東南有桃城縣今爲桃城鋪鋪旁一邱高可數仞每陰雨後隱隱有市井車馬形土人以爲蜃市云。避暑漫抄云嶺表海邊時有鬼市半夜而合鷄鳴而散人從之多得異物夜半爲市正可與日中爲市相對。拂菻國西海有市貿易不相見置直物旁名鬼市亦此類。廣西名勝志云瑞象山在來賓縣西瑤光臺記云郡之西山聳秀葱翠四時寒暑陰晴變態不一當其天宇澄霽倏



爾暝濛洪日朝暾遊雲間出悉爲白象之形宛若生  
成奔逐飄逸于西山上 說圃識餘徐中行翊叅政  
廣西出象洲計此必多象舟人云此絕無象及早行  
見山崖水次白象以千數或趨或臥其狀不一舟人  
曰山氣所結日高當不見及日出象果散滅無一存  
者 七修類藁陝西郊外忽日起烟霧漸有人物車  
騎之形又聞松江春霧時亦復有樹木屋舍 歐陽  
少師又言爲河北都轉運使時冬月按部至滄景間  
于野亭夜半聞車旂兵馬聲幾達旦不絕彼處人云

此海神移徙五七年間時有之 郎仁寶云毛翔登  
州老醫言土人捕魚海中去遠見有城府便往艤舟  
見城欹側半陷水中城樓上有榜曰青州白浪縣字  
猶可識水際膺膈臍無數見人亦不畏俯而擒之所  
得甚多歸語人往杳不可尋 山西名勝志定襄縣  
或云夏后氏所築又曰趙襄子所築俗傳朝霽時雲  
霧之中呈現樓堞 繁峙縣東百里鹵城故福都也  
周圍三百一十一步正東及西南東北呈現樓堞門  
內似有人馬現則多兩人在西則現在東不見遠則

分明近則隱沒近東五里有齊城其隱見亦同今不復見見則凶 名山記五臺山有乾闥婆城卽化城也每于日欲出時城乃現 自傲篇云唐開元未登州漁者負擔行海邊遙見烟霧蒙籠人衆填雜若市里者遂前見多賣藥物僧道尤衆良久欠伸悉無所見拾得青黛數十枚升許大不敢他用而施之浮圖式如手抄云建昌府歐陽氏西閣子壁上時時幻出樓閣簾櫳種種諸狀中一少女橫榻而坐晝清人侑羅幃半開丰姿妍冶代所未有或加足于膝以邪

幅纏之微作約縑迫袂之狀紅襜宛然人若迫視則漸移身映入幃中久之漸隱少頃都無跡矣主人以爲妖竟錮其室後不知如何 五燈會元有無邊際樓閣雲 湧幢小品高唐州驛舍夜有鬼物自空中過車馬人畜之聲一一可辨亦曰海市 聞書福寧州筆架山在大金海中嘉靖四年四月廿三日南海浮來五山自筆架山外而至峰巒突兀上有草木人馬往來貿易闔城聚觀自午踰申乃沒蓋海市也海市現于登萊海中而偶見于福寧州海中者如此

閩書寧德縣隱仙嶺地名冲裏中有石室號鬼洞年  
豐則鬼嘯景泰二年有彭翁者醉行過嶺睡臥亭中  
羣鬼相語具燈燭送之扶翁以歸邑人會同令陳瑄  
記予以嘉靖四十二年壬戌四月在筠竹期蘓家夜  
方就寢下床人曰今夜更鼓響亮予傾耳聽之正發  
插定更也是夜心事淒涼亦不成寐聞其更更傳遞  
甚明至五鼓煞插俱如誰樓然筠竹去冲裏十餘里  
鼓聲在百步之內此予所親聞也非又一墟市與  
文獻通考宋紹興二十年十一月建昌軍新城縣永

安村風雪大作夜半若數百千人行聲語笑歌哭雜  
擾匆遽而凝寒陰黑咫尺莫辨窺之無所覩明日雪  
深有人畜鳥獸跡流血污染十餘里入山乃絕 後  
漢書光武建武三十有二年封泰山封禪儀日車駕  
十九日之山虞國家居亭百官布野比日山上雲氣  
成宮闕百官並見之 月令通考汝南臨汝縣南十  
八里廣成陂西垠有小山曰崆峒若九秋三春晴麗  
必有毒霧起山崑彌亘數里樓殿輻輳花木爛然數  
息而止時謂廣成子化城 槎庵小乘長沙益陽去

府治三百餘里益水中時見長沙城隍人馬形色悉可審辨或停驂移晷乃漸散滅 高郵州有一寺講堂西壁枕道每日晚人馬車輿悉透壁上衣紅紫者影中鹵莽可辨壁厚數尺辰午之間則無 唐國史補凡海上居人時見飛樓如締構之狀甚壯麗者太原以北晨行則烟靄之中覩城闕狀如女牆雉堞者皆天官書所說雲氣也

天神形現

帝王之道天監日臨陟降左右詩曰敬之敬之天惟顯思此其道也豈必空中真有其形像哉

清波雜志龍圖閣直學士提舉醴泉觀兼侍讀編修國朝會要詳定九域圖志編類玉輦禮制局詳議官蔡攸奏臣伏承聖恩差冬祀大禮陞輅執綏十一月五日陛下御玉輅自太廟出南薰門至玉津園蒙宣諭臣曰玉津園東樓殿重複此是何處臣對以城外無樓殿恐是齋宮陛下曰此去齋宮尚遠可回顧果

見雲間樓臺閣數重既而審視其樓殿去地數十丈  
卽知非齋宮俄頃陛下又曰見人物否臣卽見有道  
流童子持幢幡節蓋相繼而出雲間人漸衆約千餘  
皆長丈餘有輅車輿輦多青色駕者不類馬狀若龍  
虎及後有執大枝花數十相繼雲間日色穿透所見  
分明衣服眉目歷歷可識人皆戴冠或有類今道士  
冠而稍大者或若童子狀皆衣青紫黃綠紅或淡黃  
杏黃淺碧碧望之衣上或有繪繡或秉簡或持羽扇前  
後儀衛益衆約數千許人迴放于東方稍南人物異

常旌旗飛翻飄轉所持幢高數丈非人世所覩移刻  
或見或隱又頃乃隱此蓋陛下恪祗祀事神明昭格  
示現伏望宣示史館布告天下太師蔡京等奏乞率  
百僚稱慶隨降詔以其日爲天應節時政和二年  
又通鑑載道君問林靈素願見真武聖像靈素曰容  
臣同張淨虛天師奉請乃宿殿致齋于正午時黑雲  
蔽日大雷霹靂火光中見蒼龜巨蛇塞于殿下帝祝  
香再拜曰願見真君幸垂降鑒霹靂一聲蛇龜不見  
但見一巨足塞于殿下帝又上香再拜云伏願立元

聖祖應化慈悲既沐臨降得見一小身不勝慶幸須臾遂見身長丈餘端嚴妙相披髮皂袍垂地金甲大袖玉帶腕劍跣足頂有圓光結帶飛繞立一時久帝自能寫真寫成忽不見次日安率醮謝蔡京奏云竊恐真君未易降于人間昔日太宗皇帝曾命張守真請降亦有畫本藏于閣下乞取對之可見真偽乃宣取展看與見本並無差殊帝愈悅

南史南昌滕曇恭五歲時母楊氏患熱思食寒瓜土俗所不產訪不能得銜悲哀切俄一桑門曰我有兩瓜分一相遺還以與母舉室驚異尋訪桑門不知所及及父母卒水漿不入口者旬日感慟嘔血絕而復蘇隆冬不着繭絮蔬食終身每至忌日晝夜哀慟門外有冬生樹一株忽有神光自樹而起俄見佛像及夾侍之儀容光顯著自門而入家人大小咸共禮拜久之乃滅

人之百病  
災祥之類容此類皆自門而入者人大小其類不一  
亦皆冬坐樹一科益有帳法自林而張於其類於天  
蘇利冬不普滿葉流食珠其類不一其類不一其類不一  
亦交交母平木葉不人口香清日氣清血氣而於  
八六一計其類不一其類不一其類不一其類不一其類不一

自然符印自然方藥

立方合藥以治病此岐黃之傳而醫者之常若夫道  
術胡僧符祝法水加之而痛者止臥者起則上古亦  
有祝由之科未足深訝至于不假人力而天成之符  
象方藥皆具抑亦異哉所聞矣 吳船錄云自瀘州  
百二十里至合江縣對江安樂山出天符木葉紋有  
符篆 名勝志云博羅縣雙髻峯有劉仙壇石壇高  
百丈許唐劉瞻修真處其旁生竹葉符鎮壓蛇虎  
日華瑣碎錄云峽州玉泉鬼谷子洞前有叢竹葉有

文成符葉葉不同佩之可以辟患 鬼谷先生傳云  
楚有清溪在遠安縣下溪千仞其水靈異卽郭璞詩  
清溪千餘仞者溪旁有寺竹葉上多生符篆文俗名  
鬼谷符 名勝志又云雲南縣清湖之西官道中有  
石成文如古篆籀色如丹砂號曰地符行人謹避莫  
敢踐之 丹鉛錄云莆田陳巖山有自然仙篆以紙  
摹形類禹篆 四川名勝志云廣安州篆水在州東  
北五里渠江曲尺灘下石磧平坦冬月水涸磧露仲  
春水生磧沒涇不盈尺日光照映金波透徹其年若

登則紋宛成篆籀滌洞波面其見不常邦人以之卜  
歲 丹霞子記湖廣天岳山有石壁篆文 近點蒼  
山有赤文島云是大士賣地券字如蟲篆不可辨  
南溪縣平蓋山漢真人劉景鶴隱此至魏武時始跨  
鶴仙去有石洞深邃不測中有小穴圓如盞有水出  
焉山上有木生葉其紋如篆名符葉 合江縣安樂  
山有天符葉樹一夕大風雨拔去後得於容子山葉  
如荔枝而長上有紋宛如蟲篆或以爲劉真人仙跡  
吳天璽神識碑東觀今華嚴文皇象書其畧云于



臨平湖邊得石璽青白色長四寸廣二寸刻上作皇帝四字于是改元天璽云然則璽亦有自然而成者豈特符哉 湖廣安化縣有印石方廣百十丈上有印文遇雨卽現 湧幢小品邕宜以西南丹諸蠻皆居窮崖絕壁間有獸曰野番黃髮椎髻跣足裸形上下山谷如飛猿白腰以下有皮累垂蓋膝若犢鼻力敵數壯夫遇男子必負去求合或刺殺之至死以手護腰間剖視得印方寸瑩若蒼玉字類符篆不可識 洵嘯神書鼠印合歡註云雄鼠外腎之上有文似

印兩腎相對有符篆朱文九遍者尤佳以十一二月或五月五日七月七日正月朔日子時面北向子位刀剖取陰乾如篆刻下佩于青囊中男左女右繫臂上人見之無不懽悅所求如心又治烏腋下鏡印 述異記城陽縣南有堯慶都墓廟前一池魚頭間有印文謂之印頰魚若非祀者捕而不得 海語云印魚出南海中似青魚而修廣過之頭骨拆如解顱之嬰腦後垂皮方徑三寸許若道巾之披餘然上有黑文儼如篆籀島嶼間有獲者必珍藏之

雲仙雜記幽燕思先驛後有五樹檜忽生藥圓試摘服之往往療疾有驗 名勝志云漢夏侯詵侍母疾衣不解帶者二年徧覓藥方不得天降仙藥于其屋後桑枝上按訥河南寧陵縣人 扁鵲墓在湯陰縣伏道村鵲秦人聖于醫爲同輩所嫉刺殺于此祠堂碑刻列于墓左墳上土可療疾禱而求之或得一小丸如丹劑服之旋瘥揮塵新談又云扁鵲墓在任丘縣其祠名藥王祠祠前有地數畝病者禱神以攻卜之許則其從某方取藥如言取出果得藥無勿愈者

其色味不一四方來者日掘千窟明日俱平壤矣潞安府襄垣縣仙堂山上有龍洞及仙堂寺山岡有琉璃巖巖中有石如人又有石九圈如車輪環水其中雖旱不涸前有隙地生石子藥丸隨人采取去則復生 將樂縣玉華洞石函有五色石丸光瑩圓淨如梧桐子是赤松子採藥處遺藥救人旋取旋有登真隱訣云委羽山天下第二洞天號大有空明之天青童君之所治也地所產石無大小百碎皆方煮湯服之可以愈疾 文獻通考云勃泥國有藥樹取

其根煎爲膏服之及塗其體兵刃所傷皆不死 夢  
溪筆談云國子博士李餘慶強于政事果于去惡死  
葬于橫山人至今畏之過墓者皆下有病瘧者取其  
墓土着床席間輒差 談藪云大溪山在廣州境舊  
山有一洞其處所人不常識每歲五月五日洞開則  
見之士人預備紙墨刷帚入其中以手摸石壁覺有  
罅隙若鐫刻者以墨刷其上印模而出持所印紙視  
之或咒語或藥方所得皆不同亦有不成字無所得  
者咒術藥方應用無不效驗蓋南法之所出

浮山浮墩浮田

附浮屋

山靜物也而有浮山浮則動矣墩與田附地而靜者  
也乃有浮墩浮田浮則動矣世人知靜中之動然後  
知動中之靜也 名山志云浮山一名浮渡山在桐  
城縣東週迴五里高二里其西南獨峯直上千仞大  
江環繞其勢若浮故名按符音同涪浮亦音符與涪  
通用浮山者自地視之如蓄自江視之若浮不峻不  
麗巖壑相屬其中石態屈曲殊觀有巖三百有五十  
峰七十有二焉今屬安慶府桐城縣 水經注云邸

水出浮岳山山躡一處則百餘步動若在水也因名  
浮岳山今在韶州府始興縣 名勝志云浮虛山在  
香山縣七十里海中隨波上下故名今在廣州香山  
縣舊經云羅山脈自大庾嶺來距番禺東二百里上  
有桂樹神湖山海經桂林八樹在番禺東卽此浮山  
乃蓬萊之一島堯時自會稽浮海而至與羅山合而  
爲一今在博羅增城之間吳元穎古跡記云浮邱山  
在海內西本羅山朱明之門戶浮在水中篙痕宛然  
今去海四里 名山記云盱眙縣浮山在縣西一百

四十里北臨淮水一名臨淮山山下有穴去水一丈  
淮水泛溢其穴卽高水減其穴還低頂上有浮空亭

桂林府東北有伏波山突起如柱去地一線不合

俗傳馬伏波試劍于此山故名 山堂肆考云浮槎

山在廬州府城東相傳自海上浮來昔有梵僧過而

指之曰此耆闍一峯也 此與桐城浮山當是一山 侯官縣更有

浮峯山屬光俗里每潮盈則山浮 慎蒙名山記云

新羅神文王時東海中有小山浮水隨波往來王異  
之泛海入其山上有一竿竹命工作笛吹此笛則兵

退病愈旱雨雨晴風定波平號萬波息笛歷代傳寶  
之至孝昭王加號萬萬波波息笛今亡拾遺記云  
洞庭山浮于水上其下有金堂數百間玉女居之四  
時聞金石絲竹之聲徹于山頂楚懷王之時與羣才  
賦詩于水湄故云瀟湘洞庭之樂令人難老雖咸池  
九招不得比焉廣西賀縣浮山挺出江中雖洪濤  
泛漲此山不沒一統志揚州府城西南隅有浮山  
高三尺長四丈五尺濶丈餘其狀似鐵不生草木以  
其浮于地上故名上有夏禹廟又泰州西北五里

有羅浮山在澤藪中不爲水所沒遠望如羅浮故名

又平陽府有浮山因置浮山縣相傳洪水時其山

隨水消長故名

荊州府境有地肺以荊州濱江西

岸洪潦常浮不沒故名地肺

湖廣府城南浮玉山

離城五里玉湖中巨石如積坡陀礧礧不以水盈縮

爲高卑故名

南康縣西有浮石形如覆鐘水環其外東坡詩浮石

已乾霜後水

湖廣橋洲在善化縣西四里上多美

橋湘江中有四洲夏月水泛漲惟橋洲不沒諺云湘

潭無底橋洲浮 江西上高縣蒙山洞有兩洞上洞不可遊下洞可遊溪不可究又有石立岩間上下無所附謂之無根石 衢州浮石潭在府治北五里有石高可丈餘水大漲亦不沒唐白居易詩浮石潭前停五馬望濤樓上得雙魚 臨海縣有飛霞石古老相傳仙人上昇于此石累三層牧豎戲于其上以手轉之不墜

湧幢小品云蘓州葑門內有土阜對峙水中雖巨浸弗沒號曰浮墩相傳此地昔有雙松叅天建炎狄難潰兵欲伐之隕石如雨乃止亦靈境也 宋方勺泊宅篇云河陽三城南北皆受水患惟中潭屹然如故相傳此潭隨水高下如浮玉地肺之類楞嚴經以乾爲洲渾濕爲巨海是也 慎蒙云雲南洱海有四洲其鸛洲隨水升沉 名山記云建安縣有浮石洞蓋溪中小嶼遇泛則與之俱浮人未嘗見其沒相傳漢梅福煉丹前山其徒陳先生者每竊食焉福怒拔劍逐之遂逃入洞中福曰此吾丹之功也遂釋之故又名逃奴洞 名勝志云靈洲在廣東封川縣廣一里

長五里江流四合雖洪水漲溢不沒古傳與水相浮  
沉故以靈名上有荔枝庄

水經注云交趾有雜田其田從潮水上下民墾食其  
田因名爲雜田 閩書薤菜蔓生花白莖中虛摘其  
苗土壓之輒活一名薤菜遯齋閒覽本生東爨古倫  
國蕃舶以薤盛之故名薤菜漳人編葦爲筏作小孔  
浮水上如萍根浮水面莖葉皆出于葦筏孔南方奇  
蔬也此亦浮田之類 玉堂閒話云廣州番禺縣常  
有部民謀訴云前夜云失蔬圃今認得在于某處詣

縣宰判狀往取之有北客駭其因詰之民云海之淺  
水中有藻荇之屬被風吹沙與藻荇相雜其根既浮  
其沙或厚三五尺處可以耕墾或灌漑圃故夜或被  
盜者盜之百餘里外若浮筏之乘流也以是植蔬者  
海上往往有之

河南確山縣有確山世傳何曾見此山有日杵自動  
有聲取之不出又謂之浮石嶺

名勝志

湖廣黃岡縣

崎山有大小二崎小崎有飛來石其下石柱推之可  
轉而不仆 餘杭徑山舊志有方僧與國一禪師說

法僧曰此有頑石汝能叱之使下乎師曰吾能使之  
上不着天下不着地乃大聲喝之其石隨而上復喝  
之石隨而下近年縣令王某以絲線徹底經之與石  
座無毫髮沾染其神異如此 候官縣城門山有飛  
來石其大可高數丈餘離地二三寸有數小石如鴨  
卵支其下默而推之則動或預語往推雖數十人共  
力不動也 同安縣薛嶺臨海有動石在篋管港口  
潮至則自動又有浮沉石潮漲其石不沒潮退則石  
沉海底人以爲異 漳州雲溪龍洞山有風動石虛

出絕崖撼之卽動剛風亦然正德志云 山頂有風動  
石高五丈濶一十八丈下有巨石盤閣之此石四面  
均不偏倚其下適兩尖相當故風來則動

廣德州建平縣舊有浮城其城中有古樹莫能名斧  
之則淋漓如血其地極窪每夏潦暴漲諸圩悉沒惟  
此城巋然似浮在水

慎蒙名勝記朝鮮萬瀑洞上有峯曰獅子岩洞有普  
德窟鑿絕壁架板立銅柱于外構小屋三楹于上名  
觀音洞拘以鐵鎖釘于岩石浮于空中人登則搖中



置佛函外施鐵網以防手摸夫張志和所云浮家泛宅浮于水上有水可憑此屋浮于空中斯爲異耳耳談云渾源州倒馬關外有嶺峭削千仞漢武時于壁上鑿孔橫攢巨木作基因而重疊架樓三座鉅麗巍峩上接于天下不着地所謂空中樓閣復在巖唇半爲所覆雨日不及歷代及明嘉靖間重修真天下大巧而奇觀也架棧曲屈爲道而上番騎至則去棧故不經兵火

### 化石

化書言有情之物能化無情夫至于石則無情之極矣顧徵于古則化石者甚多品類焉 儋州昌化縣峻靈山本名朝明山上有二石如人相傳有兄弟下海捕魚化爲石號兄弟石又有石若冠帽乃二兄弟所遺及石池石船皆其所乘遊者 滙水所經有貞女峽峽西岸高巖名貞女山山際有石如人形高七尺狀如女子故名貞女峽古來相傳有數女取螺于此遇風雨晝晦忽化爲石 方輿勝覽云三石在廣

西永安州城南十里僞漢時有兵入靖江過此黎明  
遇獵者牽黃犬逐一鹿兵以鎗刺鹿徐視之石也已  
而人犬與鹿皆化爲石鼎時道旁今一石尚有瘡痕  
南甸宣撫使內弄山有石和尚相傳昔大理一僧  
來南甸坐化于此久乃變石 地圖記有夫婦二人  
將兒入山獵其父落崖妻子將下救之並變爲三石  
錄異記乾符中天台有僧與同侶從臨海縣得洞  
穴行數十里其俗素習噫氣同行者飢甚詣市肆乞  
食人曰若能忍飢速還無苦若啖此地食必難出矣  
食畢其啖食者立化爲石 二酉委譚云甘州一山  
洞中有一立化神女名某母其旁有屠者蹲踞而化  
云初屠者見一女子買猪肝一二片疑之乃微踪其  
往至一山洞中屠者就見焉女爲說法因各化石皆  
真身也第神女身上無所繫下去地將一尺竟不知  
何以中懸助甫每往視輒令人手捫之竟不着地云  
宋史紹熙元年崑山縣工採石而山壓二年六月  
他工採石隣山聞其聲呼相應答如平生其家鑿石  
出之見其妻喜曰久閉乍風肌膚如裂餓頃聲微噤

不語化爲石人貌如生 又金罍子云有道者化白  
石羊題勝曰修羊公 十六國春秋云晉末雁門郡  
吏賈相入句注西陁見一老人言四十年後聖人出  
于北方時常八樂老人隨化爲石 東陽志云與三  
衢相近日容車山上有石周三百步高三百丈有賣  
薪者每五鼓適市過之如聞梵唄聲後十年山拱破  
岡湧起一石僧跏趺而坐衆大驚異因建石僧院以  
祠之 慎蒙名山記云石婦山在廣德州衆山環繞  
中一峯獨高有石高二丈許如婦人狀舊傳謝氏女  
介潔有守登山化爲石藤蘿薜荔繞其上如衣被之  
狀獨露其面樵者不敢採

豫章記云仙人王子喬駕白象遊于高安之荷山其  
象化爲石 山川記異云河南府有象莊漢時西域  
僧以象馱經至洛陽化爲石 湧幢小品云昔有神  
人驅石之海祝曰蒼蒼爲牛鑿鑿爲羊羊牛來斯曰  
驟而驟石皆羣奔鞭之流血旣出谷見老姥問曰見  
吾羊否姥曰奔石也羊吾不知又問見吾牛否曰奔  
石也牛吾不知神人曰惜爲汝道破因忽不見惟羣

石存焉 普寧州西十里牛戀村相傳有異人牧牛  
滇海邊牛夜入水戀草忽鷄報曉牛盡化爲石水中  
石像若牛形 名勝志云雷州遂谿縣英靈下村有  
石牛南朝時客陳姓者驅牛過此土地堂前牛悉化  
爲石石皆半爲牛頭客因家于此卽雷種之祖地  
廣州城爲五羊城裴淵記戰國高固相楚時有五仙  
人乘五羊各持穀穗一莖六出衣與羊色各如五方  
遺穗與州人騰空而去羊化爲石至今猶存 神仙  
傳黃初平年十五家傳人羊有道士見其良謹將至

金華山居石室中四十餘年兄初起行索初平遇道  
人引至山與弟語問羊何在平與兄往至山東見白  
石因叱之石起成羊數萬頭其石至今存金華山中  
名勝志云石馬井在徐聞縣東五里相傳昔有馬  
常夜食人禾爲人追急入此井只留石形似馬故名  
今有碑刻石馬之人四字 岳池縣老君山舊碑載  
唐天祐間有道士乘馬至此馬化爲石道士亦不見  
漢志越嶲郡遂久縣有石猪圻長谷中有石猪子  
母數千頭長老傳言彝昔牧猪于此一朝化爲石迄

今彝人不敢往牧

太康地志云秦文公時陳倉人獵得獸若玃不知名牽以獻之逢二童子童子曰此名爲蝟常在地中食人腦卽欲殺之拍捶其首蝟亦語曰二童子名陳寶得雄者王得雌者霸陳倉人乃逐二童子化爲雌雉止陳倉北阪爲石秦祠之雄者飛至南陽後光武起于南陽

三秦記云太白山南有陳倉山山有石鷄與山鷄不別趙高燒山山鷄飛去而石鷄不去晨鳴山頭聲鬪

三十里 又有鴨山昔人見雙鴨飛入池化爲石唐乾元建鴨山寺

雲林石譜云通遠軍卽古渭州水中有蟲類魚鳴或作覓覓之聲土人見者以挺刃或堅物擊之多化爲石或長尺餘價值數十千凡兵甲刃經此石磨治者青光而不斲 祁門縣西赤嶺其嶺下有溪溪中魚能飛相傳古有爲梁于溪以取魚魚不得下夜飛越嶺漁人乃張網山上待之魚飛不過皆化爲石遇雨則赤 廣輿記鯉石在巴山世傳琴高先生于此得

道所乘之鯉化而爲石 崖州臨川水源出黎山其  
水產石鱉只是常鱉以年久被水沫相浥因成石每  
遇海潮卽飄出石鱉味鹹寒有毒主消眼翳 海槎  
餘錄云石鱉生于崖州之榆林港港內半里許土極  
細膩最寒但鱉入則不能運動片時成石置之几案  
能明目

興化名勝志云神僧智廣禪居仙遊九座山太平院  
有巨蟒廣至其所蟒口如屋廣柱錫坐其中蟒化爲  
石今院東三百步有石龕廣逾尋丈曰棲真巖俗名  
蟒口巖者是也

名勝志云澠池縣北有雲門山其寺曰雲門寺西北  
有王喬洞山石皆土所成取而破之木葉之形交錯  
其間文理具在若雕刻然洞之上二木亦皆化石而  
產枝葉猶故其舊碑云昔神仙大丹成土木皆化爲  
石 輿地紀勝云宋建炎間遂寧府轉運使衙內後  
圃有松石外猶松樹而中化爲石 重慶府永川縣  
有石松坪在來蕪鎮有松化石石質而松理或二三  
尺許大可合抱然不過相望數山有之俗呼雷燒松

續神仙傳馬湘字自然唐建中元年至永康延真  
觀前指松樹曰此松已三千年矣當化為石至夕大  
風雨其松果化近觀松皆化為石盤根大柯文理曲  
折皆在 唐書僕骨東北千里有康干河投松入水  
三年化為石其色青有松紋名康干石 墨客揮犀  
云莆田壺公山有栢木長數尺半化為石半猶是堅  
木蔡君謨運至私第 夢溪筆談云延平永寧間大  
河岸崩入地數十尺土中得竹筍一林凡百莖根幹  
相連悉化為石 花史云南康五山上有石桃故老

云古有桃樹生于嶺巔隱淪之士將大取其寔因變  
成石

宋宣和中東陽資福院燬于火獨藏經皆變為石卷  
軸宛然叩之有聲

傅大士名翕字元風于義烏雙林寺行道山多猛獸  
大士每齋竟輒持餘飯飼之自是伏匿今名餒虎岩  
餘飯化為石可琢數珠是時有陶氏子資給大士甚  
勤因付囑之曰此石他日贍汝子孫今惟此一家能  
琢他人效之石乃穿裂

述異記陽泉在天餘山北清流數十步所涵草木皆  
化為石精明堅勁其水所經之處物皆漬而為石  
張侍郎追虎鞭之虎死化為石 昔有星墮水化為  
石當彭蠡灣中俗呼落星灣



有志之士能瘳奇疾

人有奇病抱之終身而不可脫必能忍痛施療而後  
轉危為安更立功名垂于竹帛也三國志註云長山

即金華人留贊字正明少為郡吏與黃巾戰一足被創

遂屈不伸久之謂其親屬曰英雄並起而我屈蹙在  
閭巷間與死何異今欲割引吾足死則已矣幸不死  
而足伸庶幾可見用親屬難之贊乃引刀割其筋血  
流滂沱氣絕良久家人怖甚曰業已爾其伸足遂伸  
及創愈凌統奇之表薦為屯騎校尉隨諸葛恪征東



大敗魏師 晉書云魏詠之家貧嗜學生而兔缺聞  
荆州刺史殷仲堪帳下有名醫謂家人曰殘醜如此  
用活何爲遂資數斛米投仲堪造門自通仲堪爲召  
醫醫曰可割而補但須百日進粥不得笑語詠之曰  
半生不語而有半生亦當療之况百日耶遂處別室  
食薄粥閉口不語盡如醫言缺竟補始爲仲堪客後  
竟踐其位斯二人蓋所謂有志之士卒以愈疾而顯  
其功名又名賢錄云浙新昌人吳希汴性柔順事父  
宗信務得其歡心洪武初民斷指者法戍邊宗信以  
疾失將指之半里正將捕之希汴憂形于色會有善  
接者人弗之信希汴獨心喜乃截右足小指接父將  
指彼此血出淋漓月餘瘡果愈指果續已而瘡復潰  
指斷如故希汴籲天誠禱復截左足小指接如前法  
血交氣貫一指宛然如生此則至孝之極通于神明  
非特立志之謂也 宋僧癡海龍泉人崇因寺僧也  
性多騃故名癡海耳無垂珠唇不蓋齒其師語之曰  
汝貌陋福薄宜自勉癡海感其言日至東廊觀音堂  
焚香百拜每一拜以手褫落其唇并耳三年不怠不

覺上唇下垂而兩耳及肩癡海拜不已一日睡于蒲  
團夢所拜觀音垂手摩其頂曰賜汝聰明福相寤覺  
心境廓然如脫重病遂通諸部經典後著金山水陸  
儀文盛行于世永嘉江水寺碑其手筆也 纂要云  
魏賈逵爭公事發憤生瘰欲割之太祖惜之曰千人  
割千人死逵猶割之竟愈

投崖不死

置之死地而後生此在兵法為制勝之計耳君子守  
正則不立巖墻之下若夫高岸懸崖投身其下自分  
必死人亦信其竟死而全身無損此誠孝所感其中  
有天焉非可常情量測也 通志云楊氏女名細秀  
金谿人父宣邁危疾幾殆女年十四籲天求以身代  
或傳軍山懸崖千仞凡有疾捨身崖下則愈女偕祖  
往既登岸躍然投之祖意其死扳援下至溪谷聞有  
聲曰我在此視之肢體如故惟額少傷歸而父愈王

僉事稽贈之詩有至今親老在高堂萬古鄉人傳孝  
烈之句 名賢錄云祝崑麗水祝大昌之子也大昌  
隱居養親以孝稱母沒柩在堂家人失火力不能棊  
伏棺而號其火自滅復塑二親像于堂朝夕事之如  
事生崑之事大昌一如大昌之事母洪武初盜賊未  
靖崑奉母避亂山中母被賊逼投崖下崑大驚叫擲  
身赴救忽雷雨大震賊衆驚潰一時避難者俱得脫  
母悶絕崖下崑掛樹枝得不死卒救母全活洪武七  
年舉孝廉擢潛山縣知縣未幾卽陳情養母 祝枝

山野記云景泰初祥符民袁海從募戍邊母病于家  
婦徐氏割股餌之卽愈後復病婦禱于空祈立帝祐  
願進香武當以謝卽夢神與母藥一粒吞之旣寤復  
愈夫還語之故夫與母妻偕往至南巖宮徐始言向  
姑危時妾寔請捐軀代姑今當如約姑與夫愕然方  
止之宛轉已不見徐乃潛至飛昇臺旁投身萬仞之  
崖留鞋崖畔覓者見鞋大慟而已俄而姑與夫持香  
上金殿遙見一人在殿下拜禮卽徐也駭問之徐言  
方捐軀而下忽若衆擁持之不覺已在此也遂同歸

李濂云尋至王屋山訪李道人菴道人山西高平人以母病登天壇舍身崖舍身以祈其愈予詰之答

云初墮時但如行清化鎮上

鎮在河內縣去山百五十里

忽有龜

蛇左右相通始知墮崖則已坐深谷中肢體無損凡

四晝夜罔知飢渴天壇老道士聞其捨身覓而得之

時隆寒俾之附火右足悉墮其指自是母病亦愈遂

結菴山中 閩書吳景文妻鄭氏洪武元年木溪寨

寇至舉邑驚走鄭及女伴十餘人避難山谷棄其週

歲兒瑾上草中寇進迫之自高崖投下衣絙于棘身

久復墜不死而右足折一女同投者衣無所絙齏粉

矣寇退瑾亦無恙人謂天相而邑人稱同投者曰投

崖女子乃建寧府政和縣人也 又松溪縣李述之

母黃妙銖至正丙申青田寇侵縣妙銖方盛年與羣

婦逃出郭門被執據地哭拏不行驅迫之投高崖下

寇舍去至暮述父跡得之而猶生也 徐仲光孝童

記云童子姓孔曲阜至聖裔年十歲母病醫謂不可

起童子日夜涕泣私祝泰山神願隕身以續母壽既

而病愈童子告家人曰嘗許禮泰山必身往酌母許

之山之絕頂舊有捨身巖高不可測童子呼從者導  
往臨崖頓顙奮身自擲而下從者無由持救且絕無  
根逕可尋覓是日泰安州守將有所適過山麓見空  
中片雲結集若有人影躡之搖颺上下守以爲仙也  
歇驂望拜已而雲益近閃忽之際欻然墜地乃一童  
子詢之自言氏籍及捨身報母之意不知何自有雲  
扶擁至是守贊羨爲給貲遣吏送歸時癸巳初夏也  
按墨莊漫錄云劉安世器之在都下僧化成見之曰  
公在胞胎中有不測驚危幼年復有惡疾幾爲廢人


然卒無恙蓋器之父航赴官蜀中時母方娠遇棧道  
天雨新霽磴滑危甚忽石墮馬蹶夫人已墮崖下矣  
衆皆驚泣無復生望詎使下瞰崖腹有巨木葛藟縈  
結蟠屈如蓋落葉委藉夫人安坐于上呼之卽應乃  
以衾幪懸繩而上了無所傷至官未幾而育器之後  
十餘歲居京師苦赤目甚惡睛溢于外百醫莫差一  
日有客云某一相識來調官畜惡目藥甚效昨已陞  
辭早晚卽行試遣人往求之時行李已出房云藥誠  
有之忘記在某篋中初發一篋藥乃在焉以藥傅睛



上軟綿纏護戒七日方開一傳痛卽止及開睛已收  
入內眸子瞭矣又耳談載一女子隨父宦蜀墜棧道  
中無可爲計三年宦歸投一近崖之寺將追薦亡者  
見佛案前一花非世所有僧云一仙女飛空至常以  
是花供佛于是候之至來則卽前女也亦因藤蘿藉  
護而不死食藤花實久乃能飛與之歸復無異恒人  
焉此則無心而墮乃亦有緣而生俱非意計所及  
原化記京兆韋氏名家女適武昌孟氏唐大歷末孟  
與妻弟韋生同選韋生授楊子縣尉孟授閩中錄事

叅軍分路之官韋氏從夫入蜀路不通車輿韋氏乘  
馬從夫至駱谷口忽然馬驚墜于巖下數百丈視之  
杳黑一家慟哭無如之何遂設祭服喪捨去韋氏墜  
下約數丈在枯葉之上體無所損悶絕而甦經一日  
飢甚取木葉裹雪而食傍視有一巖罅不知深淺仰  
視處如大井焉分當死矣忽于巖谷中見光一點如  
燈後更漸大乃有二焉漸近是龍目也韋懼甚負壁  
而立此龍漸出可長五六丈至穴邊騰孔而出頭又  
見雙眼復是一龍欲出韋氏自度必死寧爲龍所害

候龍將出遂抱龍跨之龍亦不顧直躍穴外遂騰于空韋氏不敢下顧任其所之如半日許意疑已過萬里試開眼下視此龍漸低又見江海及草木其地度四五丈恐負入江遂放身自墜落于溪草之上良久乃甦韋氏不食經三四日氣力漸憊徐徐而行遇一漁翁問此何所漁翁曰此楊子縣韋氏私喜曰去縣幾里曰約二十里韋氏具述其由兼飢渴漁翁取舟中茶粥飲食之韋氏問曰少府到任未翁曰不知韋曰某卽少府之姊也倘爲載去至縣當厚相報漁翁

與載至縣門韋少府已上任數日矣韋至門遣報孟家十三姊欲入韋生不信曰姊隨孟郎入蜀那忽來此韋氏令具說此由韋生雖驚亦未深信出見之其姊號哭話其遭厄顏色痿痺殆不可言舍之將息尋亦平復韋生終有所疑後數日蜀中凶問果至韋生意乃豁然追酬漁父二十千遣人送姊入蜀





本  
巻  
終

九  
ノ  
三

五  
四



